



Insik Vunzcaen Insik Sengmingh

珍惜亲人 珍惜生命

Miz ngoenz he, Vangz lauxsae hawj dou guh baez caencingz caeksawq he, baez caeksawq neix, sawj gou roxnyinh daengz, vunzvunz cungj yaek insik sengmingh, insik vunzcaen swheij.

Lauxsae heuh dou sij haj boux vunz swheij cei qyaez haenx. Gou sij daxboh, daxmeh, yahdaiq, goengda caeuq dahcej. Lauxsae youh sing hung naeuz: "Aen goj daih'it hai-nduj!" Lauxsae hainduj gangj gojgaeq:

"Gyajsiet vunz ndaw ranz miz boux he bae lijyouz, naengh aen feihgih haenx oksaeh lo, vunzcaen deng nanh lo." Gangj sat le, lauxsae sing naekcaem naeuz: "Cingj mwngz daj gij coh mwngz sij haenx ca bae boux he." Ndaw gyausiz sawqmwh caemrwgrwg. Gou yawj gij coh gou sij haenx, mbouj rox ca bouxlazw bae ndei, doeklaeng gou ca dahcej bae.

Lauxsae hainduj gangj aen goj daihngaih: "Gyajsiet boux vunzcaen he naengh hojceh bae Gvangcouh guh seng'ei q, doeklaeng hojceh oksaeh lo, vunzcaen deng nanh dai bae lo." Youh daengz ca bae boux vunzcaen he, aennaj vunzcaen lumj youq baihnaj gou nei, gou fwngz saenzdedded ca

daxboh bae.

Aen goj daihsam hainduj lo: "Song boux vunzcaen youq Yinznanz guh seng'ei q, song boux de naengh aen banci hai youq gwnz lohbya, doekfwn lo, lohbya raeuzrwd, banci deng byoek roengz dat bae, boux vunzcaen he dai bae, boux he deng sieng naek." Gou sawqmwh daej lo, gaiqfwngz saenzdwdwd ca yahdaiq caeuq goengda bae. Moix ca boux he, sim gou couh lumj deng cim camz nei, roxnyinh swheij lumj bouxgajvunz nei gaj dai gyoengqde. Haujlai doengzhag hix daej lo. Lauxsae youh gangj: "Vunzcaen deng sieng haenx yw geij bi le, yw mbouj ndei hix dai bae lo." Geij aen coh neix cij lw

daxmeh lo, aengoj laebdaeb: "Boux vunzcaen doeklaeng vih gouq boux lwgnyez doekraemx hix vutmingh lo." Couh yaek ca daxmeh bae lo, seizde gou roxnyinh mbwn raemh mbwn laep. Cij dingqny i lauxsae naeuz: "Gyoengq doengzhag, gaej yousim, gij vunzcaen mwngz lij ndangcangq lix dwk, sou moix ngoenz cungj yawjraen gyoengqde. Yienznaeuz ngoenzneix raeuz caeksawq haenx dwg cungj guhcaemz he, hoeng hawj raeuz roxdaengz le wnggai insik sengmingh, insik moix boux vunzcaen henz ndang raeuz!"

Sengmingh dinjded, dijbauj, hawj raeuz insik sojmiz henz ndang raeuz ba!

(roek nienzgaep Luz Yasin)

Gou Gyaez Angjak

爱逞能的我

Go gyaez angjak, gij saeh bouxwnq mbouj gamj guh haenx gou gamj guh, gij saeh bouxwnq siengj mbouj daengz haenx gou siengj ndaej daengz. Gou caet bi couh rox bin faex, bet bi couh rox apraemx, mbon rongzroeg, gyongz rongzdoq gou cungj guh gvaq, gij saeh epya doek roengz daemz bae cungj miz, hix aenvih yienghneix hawj daxboh daxbeh dem le mbouj noix mazfanz.

Geiq ndaej miz baez ndeu, gou caeuq daxmeh bae ranz daiq. Gou ngamq daj baihrog guhcaemz haeuj ranz, raen youz ndaw rek ranzdajcawj hoenzfoedfoed, gou gag siengj dai lo, danghnaeuz feizcoemh couh cuet lo. Aenvih neix dwg aen cauqdoj lajmbanj, henzde miz haujlai fwngz caeuq nywj, gig yungzheih dawzfeiz. Youq seiz gaenjgip neix, gou siengj daengz swheij dwg bouxsai dandog ndaw ranz, yinvu ndaepfeiz couh doek youq gwnz ndang gou lo, gou siengj daengz

youz dwg mbouj ndaej aeu raemx daeuj ndaep, feiz dawz aeu miz yangjgi, aeu doxgaiq daeuj gek couh ndaej lo. Deng, mbouj dwg miz vunz aeu denz daeuj gouqfeiz ha? Gou siengj hix mbouj lai siengj, sikhaek buet haeuj ndaw rug bae, dawz fandenz couh buet okdaej. Haeuj ranzdajcawj bae, yahdaiq cingq youq gizde, gou nyoengx de gvaq henz bae, dawz fandenz goemq roengz rek bae. Cij dingqny i yahdaiq "a" sing he, gou ganjgip lwnh de: "Daiq, seizneix mbouj miz maz saeh lo, feiz dawz mbouj hwnjdajcawj lo." "Mwngz guh gijmaz ha? Gou hawj youz ndaw rek ndat le cauq byaek, mwngz...mwngz...aeya, fandenz gou ha!" Gou doeksaet dwg aj bak ngaungau...

Ngoenzhaenx, daxmeh youh son gou haujlai, danhfanz guh saeh gaxgonq itdingh yaek lai siengjsiengj, lai camcam, gaej caiq angjak lo.

(seiq nienzgaep Vangz Yinoz)

Diuzdah Gyaeundei

多姿的小河

Ranzmbanj gou miz geij goengq bya iq, gwnz bya miz benq diegnywj heusubsub he, henz diegnywj miz diuz dah iq gyaeundei he. Dah iq lumj diuz daihloh gyaeundei he, ndaw dah ciengzciengz youz gvaq geij duz bit iq, lumj gyaqci youq gwnz loh hai gvaq nei.

Dah iq gyanghaet, song henz dah heusubsub. Raq rumz liengz he ci gvaq, gomeg youq ndaw rumz bi gyaeuj diuqfoux. Muengh gvaqbae, lumj langhhaej nei fubfub febfef, hawj daihdeih bu caengz deihdamj heu he, boiq ndaej diuzdah engqgya gyaeundei.

Banngaiz, daengngoenz ciuq daengx daihdeih, diuzdah youq laj daengngoenz wenjmyagmyag. Seizhaenx, cingqdwg seiz duzbit guh'angq. Bit daxboh caeuq bit daxmeh cingq daiq bang bit iq dwggyaez he daeuj ndaw dah ra gwn. Dou gyoengq lwgnyez dam guhcaemz haenx gwn haeuxngaiz le, daiq gij haeuxbyaek lw daeuj daengz henz dah. Dou geij daeh ok, raix byaek lw



haeux lw roengz dah bae, gyoengq bit raen gij gwn le, couh youz gvaqdaej ciengj gwnsabsab.

Gyanghaemh, ndaundeij yaep dwk lwgda, ronghndwen venj youq bien mbwn, hawj dah iq nda hwnj aenmuq saekngaenz, dah iq bienq baenz lungzngaenz lo. Duz lungzngaenz yubyub yabyab heux ndaw geij goengq bya, caeuq aenmbwn laepngau guhcaemz, gou lumj doek haeuj ndaw loq geizheih bae nei.

Diuzdah ranzmbanj, de hawj gou haujlai dauqngex gyaeundei, de youq ndawsim gou dwg diuz dah cei qyaeundei he.

(seiq nienzgaep Cij Haijig)



Lwgmax Gyaez Bang Vunz

乐于助人的小马

Youq ndaw ndoengfaex, miz haujlai doenghduz, miz duzuguk vifung, nyaenma coengmingz, gaeqseng dasang...

Miz ngoenz ndeu, lwgdouq cingq mbaet lwgraet, sawqmwh, ndaw ndoengfaex doek fwnhung, fwnhung itcig doek sam ngoenz sam hwnz. Lwgdouq yawj rog congh, dai lo, baihrog cungj deng raemx dumh lo, mbatneix baenzlawz ma ranz ha?

Couh youq mwhhaenx, gvaqdaej duz bit he, lwgdouq couh cam: "Dahcej bit, mwngz soengq gou ma ranz ndaej lwi?"

"Mbouj ndaej, yienghneix gij bwn gyaeundei gou couh deng uq lo." Duzbit mbouj haengj bang.

Seizhaenx, gvaqdaej lwgmax he, lwgdouq youh cam: "Daeggo max, mwngz soengq gou ma ranz ndaej lwi?"

"Dangyienz ndaej lo!" Lwgmax gig sangj dapwngq de.

Lwgmax soengq lwgdouq ma daengz ranz lo.

Lwgdouq gig gamjgik, doiq lwgmax naeuz: "Gyo'mbaiq mwngz, gomax."

Lwgmax maeuz: "Va aeu mbaw dak, vunz aeu vunz bang, gangj mbouj dingh gvaqlaeng gou hix heuh mwngz bang ne! Mbouj yungh gyo'mbaiq law!"

(sam nienzgaep Dangh Gyahsiengz)